



Primeiru-Ministru

DISKURSU HUSI

S. EXA. O PRIMEIRU-MINISTRU

TAUR MATAN RUAK

IHA SELEBRASAUN LORON NASIONAL FUNSAUN PÚBLIKA NIAN

Diskursu delega husi Ministru Reforma Lejizlativa

no Asuntus Parlamentares, Fidelis Magalhães

Katedrál Dili, segunda, loron 16 fulan-jullu tinan 2018

Señór Prezidente Komisaun Funksaun Públika, Sr. Faustino Cardoso Gomes

Señora no Señór Komisáriu sira

Funksionáriu Doben sira

Señora no Señór sira

Distintu Konvidadu sira

Ho ksokol boot no laran kontente tebes maka ha'u aseita konvite atu partisipa iha selebrasaun sira Loron Nasionál Funksaun Públika nian, hodi hato'o lia-fuan ruma atu motiva no enkoraja.

Governu mak “órgaun superiór Administrasaun Públika nian” tuir Artigu da-103 Konstituisaun RDTL nian hateten, tanba ne'e maka ha'u fiar katak importante tebes atu tranzmite ba funksionáriu no dirijente sira hotu, kompromisu balu ne'ebé ita asume ona ho ita-nia Povu ba tinan lima oinmai.

Kompromisu hirak ne'e inklui administrasaun públika ida ne'ebé modernu, fó rezultadu di'ak no lais liután, maibé mós besik liu, ladún burokrátiku no momoos.

Administrasaun Públika ida ne'ebé hatene kona-ba prinsípiu boot ne'ebé sai mata-dalan ba lala'ok ukun nian no ne'ebé kolabora iha implementasaun husi ninia liña orientadora sira.

Tanba ne'e, maka ha'u hakarak tebes atu ko'alia kona-ba **prinsípiu fundamentál haat atu orienta servisu públiku**, durante mandatu Governu Konstitusionál VIII nian:

1. Dahuluk mak **Unidade** – hodi promove funksionáriu sira, *atu iha Espíritu Pertensa nian, ne'e katak Administrasaun Públika ne'e ita-nian rasik*. Ida-ne'e atu hateten katak hotu-hotu tenke kontribui atu realiza vizaun Governu nian hodi kumpre ninia misaun no objetivu sira. Responsabilidade ne'e la'ós Titulár ka Dirijente sira-nian de'it, maibé parte hotu-hotu nian: órgaun, organizmu, instituisaun sira ho forma integrada no partillada.
2. Daruak mak **Objetividade** – **promove** jestaun ida ne'ebé halo tuir kritériu no tetu-didi'ak kona-ba rekursu sira País ne'e nian, ho orientasaun ba objetivu no meta sira ne'ebé atu atinje, maibé la haluha fundamentu prinsipál Administrasaun Públika nian, ida ne'ebé tuir ha'u-nia hanoin, tenke fó *“Moris-di'ak isin no klamar ba sidadaun sira”*, tuir ida ne'ebé hatuur ona iha Artigu da-6. alínea e) Konstituisaun RDTL;

3. Datoluk maka **Koordenasaun** – estimula esforsu ba komunikasaun, integrasaun no fó rendimentu ne'ebé di'ak ba meu sira, la'ós de'it iha unidade ida-idak nia laran, maibé ho mós órgaun no organizmu sira seluk, iha espíritu "Administrasaun Únika" ida ne'ebé loloos.
4. Dahaat, **Ekonomia Meios nian** [uza meu sira tuir nesesidade] – promove poupança no sees husi gastu hirak ne'ebé la tuir nia dalan ka la presiza. Meu sira ne'ebé mak iha limitadu tebes no la to'o, labele hatán ba prioridade hotu-hotu iha tempu ne'ebé hanesan. Ita tenke hatene tuir, bainhira de'it, kona-ba realidade ida-ne'e, liuliu iha momentu halo programa no hala'o gastu sira, atu nune'e bele tuir nasaun nina rendimentu no reseita sira.

Ho liafuan badak, **Ukun ida ne'ebé haree ba Resultadu**, ne'ebé sai mata-dalan ba servisu sira ne'ebé atu halo ho qualidade, ne'ebé sidadaun sira hein. Administrasaun ne'ebé labele sai refein ba meu ka prosesu burokrátiku sira ne'ebé demaziadu liu no ida ne'ebé buka, ho lalais no kuidadu, solusaun sira ba problema hirak ne'ebé benefisiáriu sira sente.

Buat sira ne'e hotu implika jestaun ida ne'ebé di'ak ba resultadu sira, la'ós de'it atu hatán ba sidadaun sira nina espetativa, maibé envolve mós política, programa no projetu sira aleinde implementa mekanizmu monitorizasaun no avaliasaun nian ne'ebé bele promove transparénsia no responsabilidade hodi alkansa melloria kontínua ida husi servisu sira ne'ebé halo ona ba ita-nia populasaaun.

Emá barak rekoñese katak iha tinan hirak ikus nian husi independénsia no konstrusaun Estadu nian ne'e, halo ona esforsu boot ida atu moderniza no profesionaliza Funsaaun Públika. Maibé, ita labele hela nune'e de'it no sente kontente ona ho resultadu hirak ne'ebé mak ita hetan ne'e.

Ita sei iha dezafiu boot sira ne'ebé mak ita sei hasoru ba oin: kona-ba hadi'a atendimentu, kona-ba kumpre prazu, kona-ba efikásia no efisiénsia husi desizaun sira, kona-ba prosesamentu keixa no rekursu sira, kona-ba simplifikasaun no dezbuokratizasaun husi prosedimentu sira no kona-ba transformasaun husi servisu ne'ebé uza surat-tahan ba servisu hirak ne'ebé, neneik maibé beibeik eletróniku no asesivel, hodi utiliza plataforma sira multimédia nian no teknolojia foun sira informasaun no komunikasaun nian.

Ita-nia esforsu atu hadi'a nian, labele para no tenke halo nafatin!

Tenke kontínuu no permanente, atu nune'e bele akompañá evolusaun husi servisu públiku iha país sira iha rejiaun ne'e no iha Mundu, nune'e mós atu hatán ba ezijénsia sira ne'ebé barak ba beibeik husi ita-nia utente no benefisiáriu sira: sidadaun, empreza no organizasaun sira.

Ita-nia sosiedade, ita-nia merkadu sira ne'ebé ita iha kontaktu, no setór sira husi ita-nia ekonomia, hakarak atualizasaun, akompañamentu, monitorizasaun no autoavaliasaun ida ne'ebé nafatin husi servisu públiku sira.

Servisu públiku sira tenke transparente, lais no responsavel hodi promove, bainhira de'it, karik bele, partisipasaun sidadaun sira nian iha dezenvolvimentu no aperfeisoamentu ne'ebé efektivu.

Halo servisu tuir Lei de'it la to'o, bainhira haluha tiha utente sira, tanba ida ne'e signifika katak haluha tiha razaun fundamentál ne'ebé justifika sira-nia ezisténsia atu **“nafatin serbí ba Povu”**.

Utente sira servisu públiku hein katak administrasaun públika hetan “rezultadu sira”, tanba ne'e apresiasaun globál ba qualidade servisu ne'ebé halo, tenke haree mós ba opiniaun utente sira nian, no ita-nia kapasidade atu hatán no rezolve nesiedade no difikuldade sira tuir tempu ne'ebé determina ona.

Ikus liu: **“Povu maka bele hatán se ita serbisu di'ak ka lae!”**

Ita labele haksolok liu resik tanba ita kumpri de'it, ho kuidadu, devér no kompromisu sira ne'ebé ita asume iha momentu ne'ebé ita hetan nomeasaun ka kontratasaun.

Ida-ne'e atu hateten katak kumprimentu ba devér jerál sira hanesan: “*Lealdade, obediénsia, zelu, sijilu, izensaun, asiduidade no pontualidade; ka devér espeisial sira hanesan*: “*hakruuk ba Lei sira, imparcialidade, profisionalizmu, kortezia, korresaun, transparénsia, responsabilidade, onestidade, unidade, integridade, solidariedade no armonia*”; no sira seluk, labele haree hanesan motivu ida atu ita hahii an liu, maibé ba dala uluk tenke konsidera hanesan kondisaun bázika ida, ne'ebé mak ezije ba funsionáriu se de'it.

Laós ezijénsia ne'ebé maka'as liu hodi eziji de'it ba sira ne'ebé di'ak liu, maibé molok atu eziji obrigasaun ida, sei ezije ba ema hotu-hotu tenke hetan nota sufisiénte iha avaliasaun dezempeñu nian.

Povu hakarak atu sira-nia Funsionáriu Públiku sira sai Modelu Referénsia nian ida, ho komportamentu ezemplár ida ne'ebé adekua ba dignidade Estadu nian no bele “*tau interese Nasaun nian aas liu interese ema ka grupu nian*”.

Tanba ne'e, ita tenke fó atensaun liután ba méritu atu kumpre objetivu sira, hodi fó prémiu regularmente ba komportamentu no hahalok ne'ebé di'ak liu hotu-hotu.

Garante katak “sira ne’ebé di’ak liu” iha asesu ne’ebé fasil iha progressaun no promosaun karreira sira, no “sira ne’ebé di’ak liu hotu” bele iha biban hodi hala’o funsaun sira ne’ebé presiza responsabilidade ne’ebé maka boot liután.

Iha sorin seluk, ita tenke rigorozu liu ho kazu inkumprimentu sira, hodi aplika pena preventiva no dixiplinár sira ne’ebé prevee iha Lei, no bainhira de’it karik presiza duni, halo partisipasaun, laho dúvida, ba kazu iregulár sira ne’ebé bele hetan sansaun kriminal.

Tau ema loos tuir nia fatin, iha fatin ne’ebé loos!

Hasai husi servisu ema sira ne’ebé mak estraga imajen di’ak Funsan Públiku nian!

Tanba ne’e ita sei fó atensaun liu ba atribuisaun regulár distinsaun no prémiu ba funsionáriu sira ne’ebé iha prestasaun di’ak liu, sira ne’ebé maka halo tuir kompromisu no devér sira, ne’ebé maka hatán ba interese públiku utente no benefisiáriu sira nian.

Ne’e mak Administrasaun ne’ebé ita hakarak harii!

Funsionáriu Públiku sira hanesan ne’e mak ita hakarak no ita presiza!

Hirak ne’e maka ita-nia Povu, sidadaun, utente no benefisiáriu husi servisu públiku sira ezije!